

PAMERAN UPM DAPAT SAMBUTAN HANGAT DI JAKARTA DAN BANDUNG



Najib : Dari UPM..... "Universiti Terbesar di Malaysia"

Seramai lebih 2,000 orang pengunjung telah mengunjungi ruang pameran UPM di Jakarta dan 1,500 lagi di Bandung untuk mendapatkan maklumat mengenai pelbagai program pengajian yang ditawarkan oleh UPM di Pameran Pendidikan Malaysia '98 di kedua-dua bandaraya Indonesia itu pada 9 hingga 13 Ogos 1998 yang lepas.

Menurut Amiruddin Abd. Aziz, Pegawai Tadbir yang mengendalikan urusan pameran bagi pihak UPM, lebih daripada 500 pengunjung telah menunjukkan minat yang mendalam terhadap pelbagai program pengajian yang ditawarkan oleh UPM, terutamanya bagi program Master dan PhD. Sebanyak 500 borang permohonan masuk ke program Master dan PhD, Akhbar Tribun Putra dan tiga kotak brosur pelbagai program telah habis diedarkan kepada para pengunjung yang berminat.

Walaupun UPM memberi tumpuan kepada program pengajian siswazah, permintaan terhadap program ijazah pertama juga mendapat tumpuan dari rakyat Indonesia terutama dalam keadaan kegawatan ekonomi sekarang ini dimana kos pengajian di negara-negara barat jauh lebih tinggi berbanding Malaysia tambahan pula dengan kemampuan Malaysia menjadi sebuah pusat kecemerlangan pendidikan dirantau ini.

Seramai 5 orang pegawai dari UPM telah turut serta dalam menjayakan pameran tersebut, diketuai oleh Prof. Dr. Kamel Ariffin Mohd. Atan, Timbalan Naib Canselor (Akademik), Prof. Dr. Mohd. Ghazali Mohayidin, Timbalan Dekan Pusat Pengajian Siswazah, Prof. Dr. Wan Sulaiman Wan Harun, Pengarah Pusat Program Luar, Prof. Dr. Azahari Ismail, Pengarah IDEAL dan Amiruddin Abd. Aziz dari Bahagian Canselori serta dibantu oleh 5 orang bekas pelajar Indonesia yang pernah belajar di UPM.

Pameran kali kedua ini yang sebelumnya diadakan di Brunei merupakan aktiviti Kementerian Pendidikan yang bertujuan mempromosi Institusi Pendidikan Tinggi Awam dan Swasta di Malaysia ke peringkat antarabangsa bagi mencapai hasrat negara untuk menjadikan Malaysia sebagai pusat kecemerlangan pendidikan serantau yang mampu menyediakan pendidikan tinggi yang berkualiti setanding dengan negara-negara barat. Disamping UPM terdapat hampir 50 IPTA dan IPTS lain yang menyertai pameran tersebut yang telah diadakan di dua buah hotel terkemuka di Jakarta dan Bandung. Pameran ini telah dirasmikan bersama oleh Menteri Pendidikan Malaysia, YB Dato Seri Mohd. Najib bin Tun Hj. Abdul Razak dan Menteri Pendidikan dan Kebudayaan Indonesia Prof. Dr. Juwono Sudarsono. Prof. Dr. Kamel Ariffin b. Mohd. Atan, Timbalan Naib Canselor (Akademik) telah menyampaikan cenderamata kepada Menteri Pendidikan dan Kebudayaan Indonesia semasa beliau melawat ruang pameran UPM.

Menurut Encik Amiruddin, UPM telah mengedar pelbagai maklumat mengenai semua program yang dirasakan dapat memenuhi permintaan rakyat Indonesia. Antara kursus yang mendapat perhatian di kalangan pengunjung pameran adalah Program Pengurusan, Ekonomi MBA, Kejuruteraan, Sains dan Alam Sekitar, Perubatan, Pentadbiran Perniagaan, Pertanian, Komputer, Rekabentuk dan Senibina, Komunikasi, Pendidikan, Bahasa Moden, Sastera dan Pendidikan Jarak Jauh. Katanya lagi, Universiti Putra Malaysia telah dapat meyakinkan pengunjung-pengunjung mengenai kewibawaan dan kemampuannya dalam menyediakan program yang berkualiti serta prasarana yang berteknologi dan UPM merupakan sebuah model universiti bagi masa

hadapan. Keempat-empat pegawai utama yang mengendalikan urusan perbincangan dan penerangan di pameran tersebut berjaya menonjolkan imej UPM sebagai sebuah universiti bertaraf dunia. Usaha ini mendapat sokongan dan kerjasama yang diberikan oleh bekas pelajar-pelajar Indonesia yang pernah menuntut di UPM. Dengan penerangan dari mereka segala maklumat dapat disampaikan dengan jelas dan terperinci. Pembentangan Seminar oleh Timbalan Naib Canselor (Akademik) di kedua-dua tempat juga telah dapat menjelaskan lagi penerangan mengenai UPM kepada para pengunjung pameran.

Encik Amiruddin menjelaskan juga bahawa pelbagai soalan telah ditimbulkan oleh pengunjung-pengunjung bagi mendapatkan kepastian dan penjelasan secara terperinci. Antaranya mengenai program-program yang ditawarkan, yuran pengajian, kos hidup, pengiktirafan, lokasi universiti, keperluan bahasa, kemudahan yang disediakan dan kemudahan biasiswa atau pinjaman.

Penyertaan pameran buat kali kedua ini dijangka dapat mempertingkatkan bilangan pelajar-pelajar pengajian siswazah selaras dengan objektif UPM untuk meningkatkan bilangan pelajar pengajian siswazah. Pada masa ini sudah terdapat seramai 3,041 orang pelajar peringkat ini di UPM.

Semasa pameran di Jakarta satu upacara ringkas telah diadakan untuk menyerahkan skrol kepada graduan Ph.D. UPM, Dr. Suraini Sujiprisati oleh Prof. Dr. Kamel Ariffin Mohd. Atan. Dr. Suraini Sujiprisati telah tidak dapat hadir untuk menerimanya pada upacara konvokesyen pada bulan Julai yang lepas. Beliau telah turut membantu memberikan penerangan yang terkini kepada pengunjung-pengunjung ruang pameran UPM.